

سامحني يحسين عنك نرتحل من ينغضي الليل نركب عالهل

ما ضل الي حال بس نسوة وعيال

عاد المهر يصهل يجر عبراته صوبين
عُزفَه اختضب كلبه ارتعب من حالة حسين
يصهل يصيح دمه يسـيح يم الصياوين

تنادي العقيله وينه خليت املنا
سرجك يمهره مايل والله انـهـلنا

وظلعت يتاماه تبجي من الذعر يا مهر لحسين عفته بيا كثر

منها الدمع سال بس نسوة وعيال

سامحني يحسين عنك نرتحل من ينگضي الليل نركب عالهل

ما ضل الي حال بس نسوة وعيال

ومن الذعر طلعت تجر ذيل الرزيه
وشافت على حر الثرى روح الزچيه
بگلبه السهم ويتجارى دم فوگ الوطيه

حاضن رضيعه وسفه حاضن رضيعه
وما تنحصي جراحه بحاله فجميعه

سكنه تناديه والگلب انجوى خذ مدمع العين لجروحك دوى

ما أصعب هلهوال بس نسوة وعيال

سامحني يحسين عنك نرتحل من ينگضي الليل نركب عالهل

ما ضل الي حال بس نسوة وعيال

گام الشمر سيفه يجر ويگطع أوداج
لما ارتقى صدر التقى عرش السما ماج
حز النحر لا مـ افتكـر طفى ضيا اسراج

فوك العوالى راسه فوق العوالى
صدر النبوه داسه شمر الضلالى

يا ساعد الله گلب العايله تنظر حماها جته امجدله

ومقطع اوصال بس نسوة وعيال

سامحني يحسين عنك نرتحل من ينگضي الليل نركب عالهل

ما ضل الي حال بس نسوة وعيال

داست على جسم العلا خيل الأعادي
حافر غدر هشم صدر عزي ومرادي
جسمه انطحن آه يا زمن وبعيني بادي

وشلون المّك شلون معضمها حيره
ومنك تَغَيِّرِ اللون شمس الظهيرة

ما بيدي حيله وتدري بحالتي حرمة وحيدة وراحت عزوتي

ما عندي ارجال بس نسوة وعيال

سامحني يحسين عنك نرتحل من ينگضي الليل نركب عالهل

ما ضل الي حال بس نسوة وعيال

سلبوا الخيم ضربوا الحرم من هجمت الخيل
وچم من طفل فر منذهل والمدمع يسيل
وظليت انا بجمر العنا بس هوّد الليل

مـ أدري شـ سوّي ياناس مـ أدري شـ سوّي
بلايا الحسين وعباس دمعاتي تهُوي

حرمه وضعيفه ما حد لي بگی حلت عليّ ساعات الشگا

أحزاني سربال بس نسوة وعيال

سامحني يحسين عنك نرتحل من ينگضي الليل نركب عالهل

ما ضل الي حال بس نسوة وعيال

حل المسا بحزن وأسى وللتل تعنيت
شفتك تريب شيبك خضيب وموتي تمنيت
وأبنيتك يم جثتك لمنظرها ونيت

سجادتك بيدي وحن يا بويه فرضك
لا تغفي أعلى التريان وياهو اللي رضك

أسال ببويه أعلي ما ترد غلبي لمصابك والله منمرد

ركني وسف مال بس نسوة وعيال

سامحني يحسين عنك نرتحل من ينگضي الليل نركب عالهل

ما ضل الي حال بس نسوة وعيال

للعگلمي للمرتمي يم شاطي لفرات
سرت بالم والدمعه دم بونات وزفرات
شفتك عفير صدرك كسير بالأعوجيات

هامك تفرى بعامود هامك تفرى
وجفك گطيعه ولزنود يا خويه حسرى

عينك صويبه من حد السهم لو بيدي شاتك وارجع للحرم

وتدري يسردال بس نسوة وعيال

سامحني يحسين عنك نرتحل من ينگضي الليل نركب عالهل

ما ضل الي حال بس نسوة وعيال

بعضم جرح طلّ الصبح أكشر علينه
ما حد لنا وشمر الخنا يحدي الضعينه
فوك الهزل دمعي يهل والله انخزينه

الله يعظم الأوجاع لمن مشينه
ولا حتى لحظة أوداع بيها احتضينه

لو بيدي ظليت يمكم يخوتي هذي يتاماي تصرخ عمتي

ما ليها كفال بس نسوة وعيال